

Dragi učenice/Draga učenice,

Želim ti sretan početak nove školske godine, uspješno savladavanje gradiva i mnogo dobrih ocjena, druženja sa vršnjacima/vršnjakinjama, a prije svega mnogo, mnogo zdravlja. Najvažnije od svega je da ti, tvoji roditelji i tvoja porodica budete zdravi.

Naši ljekari svaki dan prate situaciju i pokušavaju spriječiti zarazu od COVID-19, a mi se iskreno nadamo da će se stanje uskoro normalizovati i da ćeš u odjeljenju biti zajedno sa svim vršnjacima i vršnjakinjama. Veoma je bitno da se do tog trenutka čuvaš, da vodiš računa o sebi, o svojim drugovima i drugaricama iz odjeljenja, kao i o svojim roditeljima/starateljima i porodici. Učitelji/učiteljice i nastavnici/nastavnice će te detaljnije uputiti o rasporedu sjedenja zbog obavezne distance, ponašanju na hodnicima, odlasku u WC i prilikom ulaska u školu, kao i o redovnom pranju ruku. Također je bitno da poštuješ upute nastavnika/ca, jer smo svi zajedno u ovoj neobičnoj situaciji i nastojimo olakšati jedni drugima i paziti jedni na druge.

Molim te da se pridržavaš mjera koje su nam propisali ljekari, a upravo zbog tih mjera je i potrebno da nastava traje kraće. Vodi računa o redovnom pranju ruku tečnim sapunom. Ako se ne osjećaš dobro, nemoj dolaziti u školu, nego se zajedno sa svojim roditeljem/starateljem javi razredniku/ci, koji će ti obezbijediti materijale za dane koje nisi proveo/la u školi. Na ulazu u školu pruži ruke da bi nastavnik/ca mogao da ti izmjeri temperaturu, da bi bili sigurni da si zdrav/a i da možeš nesmetano pohađati nastavu. Poslije toga dezinficiraj ruke, radi sigurnosti, tako ćeš znati da se bez problema možeš pozdraviti sa drugarima/cama - popularno „šakovanje“. Nemojte se grliti i ljubiti, jer to može biti problematično. Nemojte se ni previše približavati jedni drugima, jer ćeš tako biti siguran/na da se nećeš zaraziti, ali možete razgovarati. Bitno je da svi poštuemo propisane mjere kako bismo štitili jedni druge i kako bismo ostali zdravi. Vodi računa da je ponekad potrebno nositi masku, opet zbog tvoje sigurnosti, posebno dok čekaš na ulazak u školu i na hodnicima škole. Masku u učionici možeš skinuti, dok sjediš u klupi, ali je na odmoru trebaš nositi, jer ćeš se družiti sa drugovima i drugaricama. Nastava će biti skraćena, tako da neće biti velikog odmora i nećeš moći izaći van školske zgrade da nešto kupiš, pa ukoliko misliš da treba, možeš užinu ponijeti u školu. Razlog tome je da se zaraza ne prenosi iz jednog u drugo odjeljenje i da ne moramo zatvoriti školu ukoliko se zarazi veliki broj učenika.

Ako se na času slučajno ne budeš osjećao/la dobro, javi se nastavniku/ci koji će te odvesti u drugu prostoriju gdje ćeš pričekati svog roditelja/staratelja i koji će te odvesti ljekaru. Ne mora značiti da si se zarazio/la virusom COVID-19 ako se ne osjećaš dobro, jer posrijedi može biti i prehlada ili gripa. Nemoj se plašiti ako slučajno i budeš zaražen/a. Bitno je da onda ostaneš kod kuće, da ozdraviš. Ako se desi da budeš bolestan/na, nastavnici/e će ti putem platforme slati materijale koje su obrađivali na časovima, da ne bi propustio/la gradivo, ali i da ne moraš da se brineš što nisi bio prisutan/na na času. Ako ti nešto nije jasno, slobodno pitaj svog učitelja/icu ili nastavnika/cu putem platforme.

Zapamti, sve će ovo proći, a do tada se svi moramo čuvati. Ti moraš čuvati sebe, svoje drugove i drugarice, svoje roditelje/staratelje, svoju porodicu. Održavaj distancu, nosi masku po potrebi i uči, druži se i uživaj u školi.

Od kolijevke, pa do groba, najljepše je dačko doba, a mi želimo da ga u zdravlju provedeš.

Srdačno i sa željom da sve bude u najboljem redu,

Ministar
dr.sc. Rašid Hadžović

